

Emasarani namutuk tonu-naboot Maromak (Klalaok II)

Ita hadi'a aan hamulak

Hutun Sarani : (Hariik bele hodi hananu tonu Maromak ba oras makbalin no sarani ulun sia tama mai)

1. Ita tonu Ama M'romak, tonu noo Oan Mane.
Tonu noo baa Kmalar Lulik, Sia Nain Tolu Ida dei.
Haleluya, haleluya! Sia Nain Tolu Ida dei.
2. Ita tonu Ama M'romak, mak beer solok Maksorin.
Nia mak latan ti'an ba ita, Fohorai Maromak.
Haleluya, tonu M'romak mak sori nola ita.

KJ 242 hodi lia Tetun

Ita hanoin ha'ak ita haloon ba Na'i Maromak¹

Makbalin : Ita mai hamutuk ne'e atu haloon baa Ama Na'i Maromak mak nase'i ti'an lale'an no raiklaran. Nia la nalu'a kedas Niakaan lima rasan.

Ita mos haloon baa Na'i Yesus, Niakaan Oan mane kmesak.

No tenik baa Kmalar Lulik mak nanorin ita lia lulik Maromak, nebee ita bele di'ak hikar hoo Maromak.

Ita foo tabe baa malu

Makbalin : Nebee Na'i Maromak leo nola emi, lituk nola emi.

Hutun sarani : Nia mos leo bele ita hotu.

Ita hahuu hamulak²

Makbalin : (Leno lia tohar ulun nosi Maromak Manfatin)

Hutun sarani : (Foti hananu hosi MM...)

(Tuur hikar)

¹ Ita hanoin ha'ak ita haloon ba Na'i Maromak, hodi lia Latin na'ak, *Votum*.

² Ita hahuu hamulak, hodi lia Latin na'ak, *Introitus*.

Ita katak sain itakaan hahalok aat sia

Makbalin : Ina-ama sia mak Na'i Yesus nadomi naklaran, mai ita hara'ik aan baa Ama Maromak oin no nahon, hodi husu Niakaan laran di'ak nebee Nia simu nola ita, namoos nola ita nosi itakaan sala no aat sia.

(Ita ida-idak hamulak hakro'an iha neon laran)

Ama Maromak, ami tama mai, saru'i mai, hodi aat no sala, tan ami hakur ti'an, haksoit ti'an ama ukun badu, hodi amikaan ibun no amikan neon no tenik amikaan tuur hariik loron-kalan.

Ami mos katak sain na'ak ami ida-idak haka'as aan du'uk, ida la fila ida, ami la hadomi malu, ami la titu malu, no ami halo aat waik oi-oik iha Ama oin lulik boot. Tan nia, ami husu no haloon, Ama kasu mamooos ami lai, modi amikaan Na'i Yesus raan.

Ami tama hodi mesa amikaan Na'i Yesus Kristus naran. Amen.

Hutun sarani : *(Hananu)*

Baa Yesus oin lulik, ha'u katak a-aat sia hotu.
Kodi neon no laran tomak, baa Yesus oin lulik.

NR no136 : 1 hodi lia Tetun

Makbalin katak no nalore Na'i Maromak laran di'ak ba ita

Makbalin : Ha'u ne'e, Yesus Kristus atan. Kalo kmaluk sia haraik aan hodi neon no laran nunia, oras ne'e ha'u kodi lia Na'i kato'o Na'i Maromak laran di'ak baa ita na'ak, Nia no'as lakon ti'an no nalu'a hotu itakaan sala no aat sia. Tan lia krarain lulik na'ak:

Na'i Maromak nadomi ema raiklaran, to'o Nia solok Oan Mane mesak mai raiklaran ne'e. Hodi nunia, ema hotu-hotu mak fiar baa Oan, la kona kastikar mak sasa fa'e sia nosi Na'i Maromak ona, mais sia netan moris nima-nimak no Nia.

Hutun sarani : *(Hananu)*

Masik ha'u ne'e ema mak salan, Na'i M'romak nadomi luku.
Hodi nunia foin katene, Na'i M'romak nadomi ha'u.
Ha'u ketan matak-m'lirin nia, ha'u tonu-mose Nia bei-beik.

NR 137 hodi lia Tetun

Ita tonu-haboot Na'i Maromak bele-bele Na'i Maromak

Hutun Sarani : *(Hariik bele)*

Makbalin : Heiii! Ema raiklaran nee ktomak,
mai tonu no mose Na'i Maromak hodi hahii bele.

Hutun sarani : Ita hahii hodi tonu tebe-tebes Nia,
tan Nia hanesan tariuk fatuk, foho fatuk mak ita heli aan fatik.

Makbalin : Mai ita tama ba Niakaan tafatik lulik hodi hananu no bareka lian!

Hutun sarani : Ita hahii hodi hananu tonu Nia, tan Nia mak Na'in.
Nia, Maromak mak boot kaliuk.

Makbalin : Mai ita tama baa, saru'i baa, hodi sudur no lo'u baa Maromak.

Hutun sarani : Ita hakni'a no lo'u baa Maromak, tan Nia mak nase'i ti'an ita.

Makbalin : Tan Nia itakaan Maromak. Ita mak Niakaan hutun renu sia
no Niakaan lima rasan mak Nia naliku no dakar.

Hutun Sarani : *(Tuur hikar)*

Klibur mananuk sia nananu

Makbalin nato'o Maromak Manfatin

a. Hamulak uluk, foin leno Maromak Manfatin

Makbalin : Kmaluk sarani sia, mai ita hamulak atu rona Na'i Maromak Manfatinik.

Aaa....Ama Maromak!

Maroma amikaan neon modi Okaan Kmalar Lulik

nebee ami bele rona Maromak Manfatin

no bali iha amikaan neon,

hodi hala'ok iha amikaan moris loron-kalan.

Ami tama mai ne'e, hodi Yesus Kristus naran. Amen

b. Leno Maromak Manfatin

Makbalin : *(Leno hosi Maromak Mamenon Tuan, lale Mamenon Foun.
Ema seluk mos bele leno. Leno hotu, ha'ak:)*

Maromak Manfatin mak ita leno, rohan baa ne'e.

Makbalin : Ema mak rona Na'i Maromak Manfatin,
hotu rai baa neon no nala'ok tuir Manfatin nia,
ema nia, ema sotir.
Haleluya!

Hutun Sarani : (*Hananu*)

5 5 6 5 ./ 1 1 2 1 / 4 4 3 2 1 / 2... / 1 ...//
Hale- luya, hale- luya, halel - lu - ya.

(Oras loron boot halirin aan; seluk hodi *Hosiana*.)

(Oras loron boot hein Yesus moris, seluk hodi *Maranata*.)

c. Makbalin keke Na'i Maromak Manfatin

Makbalin : Nato'o Na'i Maromak Manfatin.

Klibur mananuk sia nananu

Ita hanoin itakaan fafiar

Hutun Sarani : (*Hotu-hotu hariik*)

Makbalin : Ita hamutu hoo ema sarani sia iha fatin hotu- hotu, no oras hotu-
hotu, mai ita bele-bele katak itakaan fafiar ha'ak:

Makbalin
hamutuk no

Hutun Sarani : Ha'u kfiar baa Ama Maromak.
Nia Maromak mak beran kaliuk.
Nia mak nase'i lale'an no raiklaran.

Ha'u kfiar baa Yesus Kristus.
Nia, Maromak Oan Mane mesak.
Nia mak itakaan Na'i no itakaan Ulun.
Maria netan Nia nosi Maromak Kmalar Lulik beran,
masik Maria sei la naten dauk mane.
Gubernur Pontius Pilatus naruka ema nasusar Yesus.
Sia nedi n o'o Nia baa ai karuus.
Nia mate, hotu sia nakoi Nia.
Nia tuun baa ema mak mate ti'an siakaan fatin.

Baa wainrua, Nia moris nikar nosi mate.
Hotu Nia sa'e baa lale'an,
nabesi aan baa Ama Maromak sorin kwana,
iha fatin taek no neter.
Nosi ikus, Nia moos namaan aan mai nikar nosi lale'an,
atu nakotu lia bodik ema mak moris no ema mak mate.

Ha'u kfiar baa Maromak Kmalar Lulik.

Ha'u kfiar ka'ak, hutun sarani sia iha fatin hotu-hotu,
sia hotu-hotu mak Maromak eman.
Sia musti moris loos nodi neon ida, laran ida.

Ha'u kfiar ka'ak, Maromak kasu mohu itakaan salan sia.

Ha'u kfiar ka'ak, nosi ikus Maromak nalo ita moris hikar,
ita simu isi lolon foun.

Ha'u mos kfiar ka'ak, Maromak atu foo moris loos no tebes ba ita,
to'o nima-nimak.

Ha'ukaan fafiar nunia dei. Amen.

Hutun Sarani : *(Hananu)*

Ita ema s'rani hotu, musti hariik moris kmetis.
Kristus meo ulun bodik ita , oras it' hasoru funu.

NR 86 : 1 hodi lia Tetun

Ita hodi sera bodik Na'i Maromak

Sarani ulun : Sarani sia. Nebee ita hatene ha'ak di'ak wa'in ne'e mai nosi Maromak,
mai ita hodi sera ba Maromak.

(Dale notu nunia, sarani ulun latan kakaluk sera ba maklibur sia)

Kmaluk sarani sia mai ita hamulak:

Aa... Ama lara di'ak, Ama lara madomik.

Ama lara di'ak tebes, to'o naliku ami hutun nodi di'ak oi-oik.

Ami tama mai hodi sera, hodi hakmasin no haloon,
nebee Ama simu mola, miti mola amikaan seran no haloon ne'e.

Ami sera bodik haboot no tonu Ama naran lulik,

Ama beran boot. No bodik keke haluan Itakaan fohorai.

Ami tama mai hodi Yesus Kristus naran. Amen.

Hutun sarani : *(Nanau kananuk sera ida oras maklibur sia sei libur sera)*

Hutun sarani : *(Hariik bele, nananu kananuk sera ida seluk, foin maklibur sera nodi sera mai natetu. Ba oras nia mos, hutun sarani mak nodi sera ulun, mai natetu baa ai balun sera laran.)*

Sarani ulun : *(Nanau hotu, sarani ulun no maklibur sera fila bele-bele baa tuur.)*

Hutun sarani : *(Hutun sarani mos tuur hikar.)*

Ita hamulak hodi hakro'an bodik mamaluk sia

Makbalin : *(Hamulak)*

Sarani ulun nato'o lia baa hutun sarani sia

Ita taka hamulak hodi hananu

Hutun Sarani : *(Hariik bele, hotu hananu)*

Makbalin husu Na'i Maromak foo matak-malirin bodik ita

Makbalin : Kmaluk hutun sarani, ita atu fila uma onan bee, simu hola lai Maromak matak-malirin nee:

Simu hola Ama Na'i Maromak dadomin bodik emi.
Simu hola Yesus Kristus laran di'ak bodik emi.
Simu hola Kmalar Lulik beran mak nalo ita bele talin malu.
Nebee Sia Na'in Tolu lituk emi, banin satan emi,
ohin nee to'o nima-nimak. Amen.

Hutun Sarani : *(Hananu)*

5 . 6 . / 5 . 6./ 5 . 4 . 3.

A -men. A-men. A - men.

Makbalin : *(Tuun nikar mai, latan nikar Hakerek Maromak Manfatin baa sarani ulun. Hotu nariik nodi foo tate'an oda baa hutun sia. Lia haliku malu, lia mak dadi iha hutun le'et; no lia selu-seluk mak bele nadeer no nabiit hutun sarani. Foo tatae'an hotu, foin katak ...)*

Mai ita hotu-hotu hariik bele hodi hananu.

Hutun sarani : (*Hariik bele hodi hananu.*)

Na'i Maromak naliku ita, to'o hasoru hikor malu.
Kristus domin dakar ita, Na'i M'romak naliku ita.

Reff.

To'o hasoru kikor malu, ita hasoru malu be-beik.

To'o hasoru hikor malu, Kmalar Lulik naliku ita.

KJ. 346: 1 hodi lia Tetun

(*Oras ita hananu nee, ita foo tabe ba malu hodi ka'er liman.*)

Hananu hotu, ita ida-idak fila ba uman.